

## 每週經課朗誦經文(巴克禮台語漢字)2012/10/28

### 共同經課 - 1

#### 約伯記四十二章一節~六節、十節~十七節

1 約伯應耶和華講：2 我知你萬事攏會。你的旨意攏袂阻擋得。3 此個無知來蓋密所議論的是是誰啊？所以我有講出我所無明的；就是我所想袂出的奇妙，我所唔知。4 求你聽，我欲講；我問你，你應我。5 我前耳孔聽見你，今我的目睷看見你。6 所以我家已厭惡，佇塵埃及火灰的中間反悔。10 約伯替伊的朋友祈禱的時。耶和華就互伊的景況復原，閣耶和華賞賜約伯比以前所有的加倍。11 彼時伊的眾兄弟、姊妹，及以前相識的人攏來見伊，佇伊的厝相及食；爲著耶和華所降落佇伊一切的災禍，攏悲傷來安慰伊。逐人送伊一塊銀，逐人送伊一個金環。12 按呢，耶和華賜福約伯的尾境贏過伊的起頭。伊有羊一萬四千，駱駝六千，牛一千對，驢母一千。13 伊也有七個子，三個查某子。14 伊給大查某子名叫耶米瑪，第二個名叫基洗亞，第三個名叫基連哈樸。15 通彼所在的婦女，尋無親像約伯查某子許呢媿。in 的老父互 in 佇兄弟中得著產業。16 此霎以後，約伯閣食一百四十歲，得著看見伊的子伊的孫，到四代。17 按呢，約伯年歲老，日子滿就死。

### 共同經課 - 2

#### 詩篇三十四篇一節~八節、十九節~二十二節

1 [大衛的詩，就是伊佇亞比米勒的面前假瘋癲，受趕出去的時所做的。] 我欲時時謳啫耶和華；謳啫伊的話欲常常佇我的嘴。2 我的心神欲因爲耶和華來誇口；謙卑的人聽見亦欲歡喜。3 恁及我著謳啫耶和華做大，相及尊伊的名做高。4 我曾求耶和華，伊就應我，救我脫離我一切通驚的事。5 in 抬頭看伊，就得著光明；in 的面永袂見誚。6 此個困苦的人求叫，耶和華聽見，救伊脫離伊一切的患難。7 耶和華的使者佇敬畏伊的人的四圍紮營，來拯救 in。8 恁著試看，就知耶和華是好；倚靠伊的人有福氣！19 義人有多苦難，總是耶和華救伊攏脫離，20 保全伊攏總的骨，一支亦無拍折。21 罪惡欲害死歹人；怨恨義人者，欲受定罪。22 耶和華救贖伊的奴僕的神魂；凡若倚靠伊者，無一個受定罪。

### 共同經課- 3

#### 希伯來書七章二十三節~二十八節

23 許個做祭司的，因爲互死阻隔，袂會久長，所以著真多人。24 獨獨此個因爲永永佇啲，有袂改換的祭司職。25 所以凡若對伊就近上帝的人，伊會救 in 到完全；因爲伊長長活，來替 in 祈求。26 因爲此號的祭司頭咱的欠用，伊是聖、無歹、無坵、離開罪人，成做卡高諸個天。27 伊唔免親像許個祭司頭，著日日代先爲著家己的罪，後來爲著百姓的罪，來獻祭；因爲伊獻本身，就做一下成此個事。28 因爲律法設立軟苳的人做祭司頭；獨獨律法後咒誓的話，設立子永遠做完全的祭司頭。

### 共同經課 - 4

#### 馬可福音十章四十六節~五十二節

46 in 到耶利哥；耶穌及伊的學生及大陣人出耶利哥的時，有底買的子巴底買，就是睛暝做乞食者，坐佇路邊。47 已經聽見是拿撒勒人耶穌，就喉叫講：「大衛的後裔耶穌！可憐我！」48 多多人責備伊，教伊靜靜。若是伊益發大聲喉叫講：「大衛的後裔啊，可憐我！」49 耶穌停腳，講：「叫伊來。」就叫睛暝人，給伊講：「安你的心，起來！伊啲叫你啊。」50 伊就放揀伊的衫，跳起來，去就近耶穌。51 耶穌應伊講：「愛我給你做甚麼？」睛暝人給伊講：「拉波尼，我愛得著看見。」52 耶穌給伊講：去啊！你的信有救你啦。」伊連鞭得著看見，就佇路裡隨耶穌。